



PERSEVERA

Un página di kurashámentu
i guia spiritual pa
miembronan di Scouting Antiano

Edishon 69 Yüni 2020



SPERANSA

Nos tur konosé e ekspreshon: Tanten tin bida, tin speransa.

Si! Speransa ta tene nos na bida, dunando nos konfiansa ku kos lo drecha basta nos tene pasenshi. Speransa ta eksigí pa nos sigui traha, sigui lucha, pa un dia alkansá e meta deseá. Speransa pues tin su kondishonnan. Pa bo karga speransa di rekobrá salu, lo bo tin di gasta bo remedi i sigui indikashonnan di bo dòkter. Pa bo karga speransa di yega na komodidat finansiero, lo bo tin di traha i spar sin sesar. Pa bo karga speransa ku bo yunan lo bira miembronan útil i valioso pa nan komunidad, lo bo tin di duna nan bo tempu, atenshon, kariño i pasenshi. Pa bo karga speransa ku bo bida lo yena ku pas i felisidat, lo bo tin di saka tur sintimentu di odio i bengansa for di bo kurason. Un filósofo a yega di bisa: Traha "castillos en el aire" libremente. No ta tempu pèrdí. Nan ta na nan lugá aya riba. Awor perkurá di a pone fundeshi bou di nan.

Ke men ku bo por pone bo speransa kon haltu ku bo ke, basta bo sa di ta realístiko i konkreto den bo esfuersonan pa alkansá loke tantu bo ta deseá. Ku imaginashon i dedikashon, hende tin di sigui buska pa su mes i pa su próhimo, e kos bon nan ku speransa ta primintí nos. Ban mira padilanti sin miedo, kumpliendo honestamente ku nos mes, nos famia, nos nashon, pa porfin loke speransa ta vislumbrá den distansia por bira felis realidat di tur nos dianan.

Romanonan 5:3-5

Anto esei no ta tur kos, nos ta broma tambe den nos sufrimentu, pasobra nos sa ku sufrimentu ta duna nos kapasidat pa perseverá. Perseveransia ta hasi nos hende ku un karakter aprobá pa Dios; esei na su turno ta yena nos ku speransa. Anto e speransa ei no ta defroudá nos, pasobra Dios a

drama su amor den nos kurason pa medio di Spiritu Santu ku El a duna nos.



Orashon - Speransa

Dios amoroso:

"Mi kurason ta mara na Bo, den bo man mi ta sintimi sigur."

(Salmo 63)

Mi ta pone tur mi speransa den Bo, mi Tata selestial.

Mi ta sigur ku ningun momento Abo no ta lagami pa mi kuenta.

Mi sa ku Bo lo sigui kolmami ku pruebanan di amor i guiami na bo man.

Abo ta mi úniko sosten i refugio.

Mi tin e firme speransa ku Abo lo no bandonámi nunca

i siñami e kaminda

ku ta hibami serka Bo,

ku ta e fuente di felisidat i legria.

"Ningun di esnan

ku ta spera den Bo

lo no keda brongosá." (Salmo 25)

Ku San Pablo mi ta bisa:

"Tur kos mi por den

Esun ku ta dunami forza." (Filip. 4)

Ora mi ta desampará i desanimá mi no ke pèrdè fo'i bista

ku t'Abo ta keda ku mi

ku bo Poder iresistibel.

"Boso tur anto, tuma kurashi,

no tene miedo, boso spera den djE."

(Salmo 31)

Tur mi speransa ta fiha riba Bo, awe i semper.

Den e speransa aki

oh, mi bon Dios,

mi ke biba i muri.

Amèn.